

Historia: Trabao inmenso di historiadornan y maluso haci cu historia

Desde cu a cuminsa menciona conmemoracion di 500 aña di desaroyo di Aruba, hopi a cuminsa interesa nan mes den historia di Aruba. Prome cu e fecha ey, varios persona di nos isla a skirbi buki riba asuntonan relaciona cu nos historia y despues por a ripara cu hopi interes a ser crea pa tur local ta parti di nos historia.

Awor nos hendenan a cuminsa haya e "**Ruta historico di Aruba**", mas y mas hende ta interesa den diferente aspecto di nos historia, local ta masha bunita.

Pero bunita no ta ora cu bo ta publica aspectonan di nos historia, usando **BO NUMBER** bao di nan, y ta cosnan saca di bukinan di **OTRO HENDE** of relatonan di **OTRO HENDE**, y sin cu bo ta menciona e fuente. **ESAKI NOS CONOCE COMO PLAGIAAT**.

Lagami dijes duna un ehemplo. Den un publicacion relaciona cu nos fiesta nacional, mi a ripara un relato historico bao di number di un persona.

Lesando e relato aki, mi a ripara cu ta exactamente local Pater Noyen a publica den su buki **Milefiori di Aruba** cu a wordo publica den añanan 60, y ningun caminda e persona no a menciona di unda el a saca e relato.

Ensan cu no sa ta kere cu ta e persona aki a haci e bunita investigacion aki, siendo cu lo unico cu el a haci ta **COPIA** parti di **OBRA DI OTRO**. Tabata tin mas parti di e buki di Pater Noyen publica, y ningun caminda ta ser menciona di unda a saca e relato aki.

Josy Mansur den su "**Historia di Aruba**" a haci estudio amplio di añas studiando documentacionnan na Aruba, Caracas, Coro, Puerto Cabello, Valencia, Madrid, Sevilla, Amsterdam, Miami etc. pa por a skirbi su buki.

Si mi persona of kende cu ta kier publica algo di historia, usando loke **Josy Mansur** a publica, **MESTER** referi na su buki y su persona como fuente. Mi no por publica partinan di **SU OBRA**, bao di **MI NUMBER** como si fuera ta **MI HISTORIA**.

Luc Alofs a publica por ehemplo e buki riba **Catibonan di Aruba**. Si mester usa partinan di su buki, **MESTER** menciona e fuente, indicando cu e parti aki a ser saca for di tal buki di tal hende.

Esey tabata di dos buki di e escritor aki riba aspectonan di nos historia. Y no ta den un siman of un luna el a logra e datonan publica.

Dr. Johan Hartog a publica masha hopi mes riba Aruba y si ta usa

cosnan di e historia aki, **MESTER** referi na esaki.

Naturalmente tin hopi cos cu bo ta haya den archivonan riba e islanan aki y den exterior, y cu ta cay riba e mes cos cu a wordo publico. Añanan largo el a haci estudio y investigacion di su datonan.

Bo tarea e ora ey ta di referi na e archivo (cu ta bo fuente) for di unda bo a saca e informacion.

Tin mucho hende cu ta papia y otronan cu ta skirbi cosnan riba nos historia, cu no a haci estudio riba esaki, y ta "**usa cos di otro hende, pa pronk cune**" y esey ta fout, fout y fout, y bo por hayabo dilanti mesa berde pa esey tambe, pasobra e cos aki ta castigable.

Sisi Schwengle, recientemente a publica "**Pedro Rebecca mata 4**" cu a bira un buki pa schoolnan. Un historia di un massacre real cu a tuma lugar na Aruba. El a haci un estudio via archivonan pa a yega na e buki aki, y no ta wega pa haci un trabao asina. Ora nos papia di esaki, nos mester referi na e archivo y na e buki y su autor for di unda nos a saca e informacion. Un buki masha educativo riba nos sistema hudicial di antes y awe pa nos studiantenan, y masha bunita hinca den otro cu un di e historianan interesante di local a yega di sosode riba nos isla.

Vivi Ruiz na Museo Arqueologico a saca su buki riba historia di miles di aña pasa di desaroyo di nos isla. No ta asina asina el a yega na e buki aki, ta añanan largo di estudio. Asina por sigui menciona bukinan relaciona cu nos historia y cu ta bukinan masha interesante y cu na mi opinion, den cada cas mester tin un di nan.

Wim Rutgers ta skirbiendo riba aspectonan di literatura y no ta for di su duim e ta chupa e informacionnan aki tampoco, y asina por sigui menciona.

No por publica cosnan bao di nos number, siendo cu ta copianan saca di bukinan y escrituranan di otro hende, sin cu nos ta menciona e fuente. Awe lo por tin hende cu kier skirbi di historia di añanan 20, 30, 40, 50 di e siglo aki. E personanan aki lo ta personanan cu a biba den e epocanan ey, y ta relata di nan propio experiencianan. Esey ta aceptable, pero no cu un persona di 30 aña di edad ta bay skirbi di bida di añanan 20 te 50 sin cu e ta menciona di unda el a haya e datonan y informacionnan. E no a biba den e epocanan ey.

Esaki ta skirbi pa trata na frena e tendencia di "**Pronken met ander-mans veren**" manera bo ta siña na school.

July